

興京縣志

首卷

410.45

42

128

5

興京縣志

卷首

目次

增修興京縣志序言

舊縣志序

增修縣志紀略

舊縣志纂修紀略

照片

增修縣志職員編輯姓名錄

例言

大事記

興京縣志

卷首 序言

滿洲國建國宣言

詔書

增修縣志總目錄

興京縣地圖



增修興京縣志序

余長奉省之二年適興京增修縣志縣長張君耀東董其事既成將付梓而丐序於余余曰有心哉是舉也夫親民之官德政在民可以亘數十百年而無替其父老於酒酣耳熱之餘猶津津而樂道之況致意文獻信而有徵使後世披覽者可以按圖索驥其爲不朽盛事又豈僅數十百年之比哉考是縣之志初刊於民國十有四年爲縣宰沈蘇二君所纂修整齊故事辯章舊聞已翔實美備矣惟是時間十年事殊前載其治績日新月異之處當有須於秉筆者之記述是此次增修縣志網羅舊聞補苴罅漏其重要概可知也昔尼父言夏殷之禮而慨杞宋文獻之不足徵今觀此志詳瞻美備其爲足徵文獻有功國史不既多乎東邊治安甫謐張君卽睠睠於斯可謂知所先務矣庶績咸熙企予望之

丙子春奉天省長葆

康

重修興京縣志序

縣之有志其來尙矣周禮小史掌邦國之志後世郡邑之志義蓋仿此而唐之元和郡縣志實爲歷代縣志之濫觴自是厥後縣皆有志纂修旣衆體例日嚴舉凡疆域之沿革戶口之登耗以及山川險阻物產盈虛與夫孝子仁人義夫節婦攸關政治風俗者無不兼收博採鉅細畢書蓋爲蒞官從政者資以借境用淑其治然則縣志之所關固不重哉興京向爲奉天東邊重鎮攷其爲縣則設治已久查其地勢則層巒環互戶口旣甚殷繁風俗尤稱敦厚而縣西方之虎欄哈達山

皇清之永陵在焉崛起龍飛大業斯隆誠姬周之豐鎬劉漢之豐沛

也往昔雖有縣志之刊第閱多年未經增修頃者河山仍舊邦國聿新而疆域物產以及人文因時勢之變遷蓋皆迥異於曩日是以原有志書急有待於修補增訂不可稍緩縣長張君文山蒞宰是邑積有歲年際茲政通人和百廢俱興深有感於桑梓原刊縣志之缺漏豈惟人文不彰并慮後之來者無所取資用是博訪耆老徵求故實本原志之體例補以前之缺漏事務覈實文求簡淨閱時未幾而新志卽削稿以成不獨從此文獻有徵無嘆杞宋則張君之用意亦深矣殺青旣竟徵序於余余學識謏陋第深欣張君知所先務又事關桑梓誼難固辭用書數語以弁篇首略述縣志之所關與重修之始末則知張君爲政尤爲世俗之所不可企及者也

康德二年二月邑人金名世謹序

興京縣志

卷首 序言

三

興京縣志序

志與史同工而異曲然而古之作者輒右史而左志故志亦有時附史以行而史無附於志以行之者但欲攷一時一地一事一物治忽變遷之迹盈虛升降之數使當時有所循省後世有所觀鑒則舍志莫屬縣之有志卽周官方志之遺其所由來甚遠祇以吾邑僻在邊陲前誌成於倉卒疏略之處積年而增況在今日新國肇造百度更張昨日種種苟不及時著錄將益流失漸滅不知彰往何由察來縣志之亟待重修明達之士固同具此感焉慶章生長斯鄉某樹吾先人所植某山某水吾童子時所釣遊每當暑雨昏辰涼月曜夜予懷渺渺不能不時相往來祇以年來從政京奉日鞅掌於繁委之簿書

鄉井公誼之舉更不暇顧及今縣長張公損書遠賁以重修邑志脫稿相聞斯誠先得我心哉夫一朝之崛起必綜前代之事實著之於史者乃爲國家者所有事維自建國而後當道諸公日屏營於奠基創業諸大政修明補訂之事尙未有起而作之者各縣之志實爲史料之所取擇縣志之成抑亦他日作史之前臚然則吾縣之志能先奉省諸縣而首觀厥成者其功爲綦偉矣是爲序

康德三年一月

王慶璋 撰

信
史
是
徵

奉天省公署總務廳長

竹内德亥



興京縣志序

興京張文山大令以增修縣志剗削有期遠道書來屬爲一序洵盛舉也昔薛居正舊五代史時值風會之衰世多冗弱之誚歐陽永叔踵事更新然其所採尙多沿于薛史蓋體著別裁事仍舊貫也興京爲奉省名城原撰志稿脫於清季未逮付梓竟淪散佚厥後沈蘇兩令重申前議始獲成書訖今歲逾十稔政治改革時代遷易與夫文化交通之遞進商工實業之發展歷歷皆有可考拾遺增修允爲先務旣補往者之弗及兼作各縣之先導國計民生不無裨補開來繼往當益詳明則是書所繫固匪靳一邑之文獻已也予雖未窺全豹而深慶是書之及時觀成爰舉歐陽新史之例以爲言或亦文山大

令所樂聞乎是爲序

奉天省公署民政廳長劉負初

興京縣志序

蓋聞尙書載累代之規形勢詳夫禹貢外史掌四方之志分職列於周官是以天下周知按圖可以索驥治亂能鑑考獻無待群書洎後歷代見重蔚然興起人才輩出紛然成篇國家有史地方有志凡山川之形勢疆域之廣狹政治之狀況民風之良否物產之豐絀人文之勝衰以竟委窮源之工收挈領提綱之效庶使觀政者得見一方之情狀圖治者得爲施政之稽攷甚矣哉縣志之爲重也

惟各縣縣志雖記一時之勝況萬難爲永久之依據區劃時有改更人事歷有變嬗後之人應按時修纂俾適合現代否則徒具縣志之名而非現代之志實不足以資應用故縣志之應隨時增修也但修

志非易非有相當人才預籌底欸不惟遺漏不免又恐難藏其事此縣志應修而未能修者比比是也

興京縣爲清代發祥之地陵廟所在山川靈秀民風樸厚爲奉省重地握東邊要路記其概畧原有縣志惟擇焉而不精語焉而不詳又況時異勢殊旣體裁之未備鼎新革故益事例之難沿興衰雖資比較名實頗有異同殘闕相仍陋畧已甚倘不及時修纂曷以垂示將來

張縣長耀東蒞任後閱縣志病其簡乃首唱增修并遴委人才體裁取人長以補短紀載廣搜羅而益富不主故常得徵實用史貴乎信筆貴乎正續前人漏列之篇重光盛典啓後人觀摩之念宣勞文風

脫稿之日徵序於余余喜其知縣志之可貴任事之熱心不憚煩難
能成勝舉爰記其事藉以爲序

奉天省公署警務廳長三谷 清

序

興京舊有廳志成而未刊民國十四年始有縣志之刊行已具體而微矣頃者張縣長文山倡議重修蓋將補其闕略以備一方之文獻書成行將付刊而徵序於承宗竊惟興京者始著聞於明代號稱建州三衛亦卽有清發祥之重地也嘗讀實錄及東華錄記自肇祖以下迄於顯祖皆宅於是歷世凡七閱年逾百泊太祖高皇帝龍飛遼瀋再傳遂以有天下王氣鍾孕地勢使然非盡由人力也今試循薩爾滸之戰場登馬爾敦嶺渡蘇克蘇護河而造竈突山下則見興京故城建於河南而永陵封樹峙於河北擅山川之勝境蔚扶輿之佳氣過其地者每爲俯仰流連增其歎羨蓋山川之奇氣

鬱久而必發久之而地亦以人重如漢高之豐沛光武之南陽皆其倫類興京舊爲僻壤而以京名有清之盛與奉天順天並稱三京嗚呼豈偶然哉抑興京自設治以來不過五六十年而成邑成都百政具舉張君文山復以鄉人之賢者出膺一邑之重任在職三載治蹟章明古人所謂鄉宦之效又於今見之矣茲以承命作序爰爲推明人地相闡之義以復於張君亦以見重修斯志之所繫者大也丙子孟春木蘭曹承宗序於奉天省垣

蔚然鉅觀

韋煥章



興京增修縣志序

版圖疆索之釐定爲有國家者之急務通都大邑僻壤遐陬皆莫能外若於歷史有最大之關係其志乘所載愈不容緩興京爲有清龍興重地談地理者必首及之故在昔稱王氣所鐘其山脈由長白蜿蜒而來龍蟠虎踞氣象萬千非他邑諸山所敢望東接通化西依本溪南鄰鳳城北通清原若衆星而環拱焉向爲旗籍駐防地名曰老城其官署之設曰副都統曰防禦八旗之制兵隸焉雖然其地在未開化之先亦僅荒陋之一部落耳爲遊踪之所不至文化之所不及居斯土者渾渾噩噩縛茅以居鑿井耕田含哺鼓腹風俗樸塞人烟寥若晨星迨有清中葉初設治定爲撫民廳規制略備嗣是而後生

聚蕃殖草萊日闢戶口殷閭駸駸焉而與通都大邑相伯仲自民國降而爲縣猶爲東南之巨邑扼東邊各縣交通之孔道其吸收近代文化變樸僊而文明而進至於繁盛蓋由來已久而蘊文獻之淵素啓萬方之景仰者尤莫重於有清祖宗發祥之所在陵廟巋然典章冊府攸繫非第爲各縣所矜式卽我新邦肇建政象聿新而又當奉天通志告成之秋國史省志之取材於斯邑者當必駕諸邑而上之因其地之事蹟繁蹟切要足爲考古者之資故興京一志不僅爲一縣之信史實一省一國之信史之根脉故其增修與他邑不可同日而語今幸其事已歲觀此書體例謹嚴無美不備而較之舊志又能補其闕漏詳其簡略其於政治風俗典章經制以及歷代文野之遞

遭興革之淵源咸包羅無遺蔚然而極志書之大觀也已所裨益於
政治文獻爲何如邑侯張君賢令尹也樂縣志之觀成問序於余自
忘謏陋書此以報之

康德三年四月九日啓彬序於奉天稅務監督官廨

興京增修縣志序

人君之教化貴乎普及帝國之德政端重實施自古劃野開疆設官分職廣谷大川異制民生其間異俗是以承流宣化因地制宜俾知善之當爲惡之不可爲欣然率教皆革其舊染之污而興禮讓之風則賴於賢有司焉夫興利除弊胥關循良之精神而繼往開來惟在志乘之完備舉凡政治地理之沿革禮教風俗之良窳人物藝文之盛衰物產商業之榮枯下至草木鳥獸昆蟲之微細皆宜絜領提綱分類詳述俾後之覽者咸曉然於因革損益之成規得以蕭規曹隨而收措置咸宜之效此增修縣志之所不容緩也我興邑舊有縣志編纂亦云完善惟以新國肇造帝制實施舊志之體例多有未合而

況建國伊始百度維新於一切政治之邁進文化之發展金融之統一交通之便利皆足增東亞和平之光榮若非補舊增新果何以昭掌故而垂來禩前經迭次會議詢謀僉同以擢節之餘貲爲增修之的欸乃延地方宿儒李君山亭呂君京離等先後編輯刪除不合時宜之陳言增加王道主義之善政不浮言以鋪張務慎擇而翔實廣收博采比事屬詞閱數月而歲事呈余審定且請爲序余以一介庸儒膠蒙

上峯嘉許遂綰銅章勵精圖治猶恐上無以報國下無以安民加以公務匆忙兼又短於才學雕蟲小技何堪以冠篇首第執簡瀏覽蒐羅宏富斯志之作不徒增重文獻且足資爲政者之考鏡焉是爲序

興京縣長張耀東

興京縣志

卷首 序言

興京縣志增修告成序

縣之有志猶國之有史也興京縣志成於民國十三年然印本甚尠流傳未廣事變後散失無餘且時事推移滄桑屢易國體初更人民進化日新月異而歲不同使非增修縣志將何以繼往事而資考證耶茲幸兩易星霜已藏厥事敝參事蒞任於茲瞬及三載回憶受委之際於大同二年舊軍閥之暴政方除唐李之亂甫定一切政治均未就緒倒懸之黎庶尙未登諸衽席因與縣長張公文山協力經營以整頓興邑爲已任始則維持治安以清理財賦提倡教育以啓迪民智始有政治之可言今當縣志告成索序於余故不避謏陋略抒數語附諸簡端以誌雪泥鴻爪云

前參事官中尾優謹識

康德二年十月十五日序於奉天省興京縣公署